

Ini Sa Igsulat Denu Si HOB

Ini Denu Sa Tulon Denu Si Hob

Apiya di pa mepion sa adat i Hob, dakel doo sa kelikutan di. Tigtu kawasà maama kagdi i, dodoo minedaetan sa langun taman di, lapeg sa malayan di ma, owoy duen ma sa tigtu mepasang linadu di. Agulé migtebow sa telu loyuk di owoy, diyà sa hagda penemdem, nekeuma sa medaet diyà si Hob danà sa medoo salà di. Dodoo endà netuuwan Hob i diyà iya wé penemdem da.

Egoh di nelugaylugay, mig-ikagi Nemula i diyà si Hob, agulé migpetukééy Hob i diyà si Nemula. Dodoo endà duen sa kagi i Nemula anì mesenulê danà sa salà di, owoy endà ma duen sa inikagi di denu sa pesuwan i Hob neumawan sa medaet. Igpehaa i Nemula polo sa dakel egkegaga di owoy sa egoh di tigtu Datù diyà sa langun eghauwen ta diyà tanà.

Ini Sa Edungan Kagi

1 ¹Na, duen sa etaw pinengadanan da si Hob eg-ugpà diyà sa tanà Us. Egpigtuu owoy tigtu ma egpangunut diyà si Nemula. Metudà sa adat di owoy tigtu egtulik anì endà mekebael di medaet. ²Duen sa pitu anak di maama owoy telu sa anak di bayi. ³Owoy duen ma sa medoo hinagtay di, pitu ngibu sa kebilibili di owoy telu ngibu sa kamiliyu di owoy sengibu sa sapì di owoy lima gatus sa asnu di. Medoo ma sa egsugùsuguen di owoy kagdi sa tigtu kawasà diyà sa tanà denu tebowon agdaw.

⁴Na, iya adat sa medoo anak di maama, egsesambìsambiy da egpista owoy egselengeday da, owoy egpelengeden da ma sa telu tebay da.

⁵Hê, egoh di neubus dé sa kepista da, miglapus eg-enaw Hob i owoy mig-imatay hinagtay anì mekepeuloy sa salà sa medoo anak di. Iya sa egbaelan di enù ka diyà sa penemdem di nekesalà kéen sa medoo anak di diyà si Nemula.

Ini Sa Egoh I Hob Tinepengan I Satanas

⁶Na, sebaen agdaw egoh sa medoo egsugùsuguen i Nemula diyà langit mig-angay egtaeng diyà kenagdi, migpeunut ma Satanas i^a diyà kenagda. ⁷Hê, inigsaan i Nemula Satanas i, guwaen di, “O Satanas, keduwan ko i?”

Migsagbi Satanas i, guwaen di, “Egtimbul a takà diyà siini sinukub langit.”

⁸Inigsaan i Nemula Satanas i, guwaen di, “Egkilalaen ko pa sa etaw ku si Hob? Endà duen meketepeng sa kipedu di diyà sa langun etaw diyà siini sinukub langit. Metiengaw sa adat di owoy eg-adatan di aken owoy tigtu eg-iwoden di sa medoo balangan medaet egbaelan.”

⁹Migsagbi Satanas i, guwaen di, “Endà doo kéen adatan i Hob kuna amuk endà duen sa mepion mehaa di? ¹⁰Enù ka eg-ipaten ko kagdi owoy sa medoo tugod di owoy sa langun taman di. Owoy egtabangan ko sa langun egbaelan di, enù ka egkedoo sa medoo hinagtay di mekeseluh diyà sa tanà di. ¹¹Dodoo kedani ko diyà kenagdi sa langun taman di owoy hauwen ta amuk endà tubaden di duu kuna.”

¹²Huenan di, inikagiyan i Datù Nemula Satanas i, guwaen di, “Pandayaen ku kuna mael sa ungayà ko diyà sa medoo langun taman di, dodoo yaka daa egpedaetan kenagdi.” Agulé mig-ipanaw Satanas i.

Ini Denu Sa Medoo Anak I Hob Owoy Sa Langun Taman Di Nedaetan

¹³Na sebaen agdaw egoh da telibubu egpista sa medoo anak i Hob diyà sa dalesan sa tigtu kakay da maama, ¹⁴hê duen sa egsugkow migtebow diyà si Hob, owoy mig-ikagi, guwaen di, “Ligò ké egdadu sa medoo metiig egdadu sapi ko owoy egtabtab sa medoo asnu ko diyà sa dapag ké, ¹⁵petow dé migtebow sa medoo etaw tegeSébow. Hê, sinigkem da sa medoo asnu owoy sa medoo sapi, owoy inimet da eg-uwit. Inimatayan da ma sa medoo egsugùsuguen ko. Aken daa sa nekelesò, huenan di eg-angay a egtulon diyà keniko.”

¹⁶Agulé endà pelà egkeubus di eg-ikagi, duen ma sa sebaen egsugùsuguen di migtebow, owoy mig-ikagi, guwaen di, “Nesugat sa dakel silà sa medoo kebilibili ko lapeg sa medoo tegebantay. Nematay da imet owoy aken daa sa nekelesò, huenan di kaini a eg-angay egtulon diyà keniko.”

¹⁷Agulé endà pelà egkeubus di eg-ikagi, duen dema sa egsugùsuguen di migtebow, owoy mig-ikagi, guwaen di, “Duen telu gelompok tegeKaldiya migpengayaw kenami. Hê, inimet da mig-uwit sa langun kamiliyu ko owoy inimet da ma eg-imatayan sa medoo egsugùsuguen ko. Aken daa sa nekelesò, huenan di kaini a eg-angay egtulon diyà keniko.”

^a 1:6 Iya selepangan sa ngadan di Satanas tegetipu.

¹⁸Agulé endà ma pelà egkeubus di eg-ikagi, duen dema sa liyu egsugùsuguen di migtebow owoy mig-ikagi, guwaen di, “Egoh sa medoo anak ko telibubu egpista diyà sa dalesan sa lebi lawa ko, ¹⁹petow dé migdugsuk sa meleges kelamag siling kedu diyà sa melabel tanà mediyù dalesan. Hê, nelubun sa dalesan owoy neimet nematay sa langun anak ko. Aken daa sa nekelesò, huenan di kaini a eg-angay egtulon diyà keniko.”

²⁰Hê, migtigdeg Hob i owoy kinisì di sa ginis di owoy inul-ul di sa balut ulu di danà di tigtu nebukul. Agulé miglagkeb diyà tanà anì oloen di Nemula i. ²¹Mig-ikagi, guwaen di, “Egoh ku miglesut, endà duen inuwit ku owoy amuk mematay a, endà ma duen sa uwiten ku. Si Datù Nemula sa migbegay owoy kagdi ma doo sa mighawì. Huenan di, meolò Datù Nemula i.” ²²Na, apiya di pa iya sa nehaa i Hob, endà doo nekesalà di owoy endà ma egselselen di duu Nemula i.

Ini Dema Sa Egoh I Hob Tinepengan I Satanas

(Hob 2:1-10)

2 ¹Na, egoh di neuma dema sebaen agdaw, egoh sa medoo egsugùsuguen i Nemula diyà langit mig-angay egtaeng diyà si Datù Nemula, migpeunut dema Satanas i. ²Hê, inigsaan i Nemula, guwaen di, “Keduwan ko i?”

Migsagbi Satanas i, guwaen di, “Egtimbul a takà diyà siini sinukub langit.”

³Agulé mig-igsà dema Nemula i diyà si Satanas, guwaen di, “Egkilalaen ko pa sa etaw ku si Hob? Metudà sa pedu di owoy endà ma duen sa mesigbolow diyà kenagdi. Eg-adatan di aken owoy eg-iwoden di ma sa medaet egbaelan. Danà sa kepegeni ko diyà kenak, pinandayà ku dé kuna migpelihay kenagdi apiya di pa endà duen sa pesuwan di, dodoo tapay doo migsalig diyà kenak.”

⁴Agulé sinagbian i Satanas Nemula i, guwaen di, “Iya daa sa pesuwan di egpangunut diyà keniko danà ko takà egtabang kenagdi. Endà duen sa endà ibegay di duu anì mealukan. ⁵Dodoo amuk petubuen ko sa linadu diyà sa lawa di, tubaden di dé kuna.”

⁶Agulé mig-ikagi Nemula i, guwaen di, “Na, pandayaen ku sa kebael ko kenagdi, dodoo yaka daa eg-imatay duu.”

⁷Huenan di, mig-ipanaw Satanas i owoy pinetunas di sa medoo mebagà diyà sa lawa i Hob kedu diyà sa pulu di taman diyà sa takem lisen di.

⁸Agulé migkuwa Hob i sa atung igkulakih di diyà sa medoo liboh di, owoy migpenuu diyà sa kenà da migtipon abuh tandà sa egoh di nebukul.

⁹Agulé inikagiyan sa sawa di Hob i, guwaen di, “Enù di ya, tapay ka doo egkesaligan? Tubad ko dé Nemula i anì mematay ka.”

¹⁰Dodoo sinagbian i Hob sa sawa di, guwaen di, “Sa keikagi ko lagà sa keikagi sa bayi ngahàngahà. Enù di ya, iya daa sa sakemen ta diyà si Nemula sa medoo mepion, dodoo ekedan ta sa medoo medaet?” Na, apiya di pa iya sa nehàa i Hob, tapay doo endà nekesalà di danà sa eg-ikagiyen di.

2:11 - 13:28 owoy kansad 15 - 18: Ini sa egoh sa telu loyuk i Hob migtebow anì pepionen da sa pedu i Hob. Taman pitu agdaw, mig-ugsad da daa owoy endà mig-ikagi da. Agulé iya da pelawà egseolomoy denu sa dakel kelikutan i Hob. Diyà sa penemdem i Ilipas owoy si Bildad owoy si Sapal, si Datù Nemula doo sa épê dakel egkegaga, dodoo eg-ugpà daa dutu langit dò sa kenà di tigtu mediyù. Iya sa pesuwan di egpandayaen di sa egkebaelan sa medoo etaw diyà tanà. Diyà sa penemdem da, neumawan Hob i sa dakel kelikutan di enù ka egpigtamayan i Nemula danà sa salà di. Dodoo si Hob, egkelukuy umolom diyà si Nemula anì metiigan di sa pesuwan di duen sa medoo neukitan di.

Mepokò Daa Sa Lalù Etaw

14 ¹Mig-ikagi Hob i, guwaen di, “Na, tigtu mepokò daa sa hagtay sa etaw, owoy nepenù kelikutan. ²Lagà sa bulok melemu melaeb, owoy melemu mekedan lagà sa alung daa egtalà. ³O Nemula, maen di ya eg-inengtengen ko aken, owoy egpetaengen ko aken diyà keniko anì kukumen ko? ⁴Endà duen sa metiengaw lumesut kedu diyà sa etaw endà metiengaw. ⁵Tapay dé netiigan ko sa lugay lalù sa etaw diyà tanà. Binaelan ko sa ketamanan di, owoy endà dé mekelowon di dahiya. ⁶Yaka dé egsagipà duu, dodoo pelebù ko dé taman meelut sa kelikutan egkeukitan di.

⁷“Adi-adi pa sa kayu, enù ka amuk kinasing tapay doo sumulow owoy manga dema. ⁸Apiya di pa lukes dé sa medoo dalid di owoy éhê egoh palas mengangu dé sa tued di, ⁹tumunas doo amuk mewayegan owoy manga dema lagà sa batà pelà kayu. ¹⁰Dodoo sa etaw amuk mematay, iya daa sa ketamanan di. Amuk mebugtus dé sa ginawa di, ngadan kéen sa angayan di? ¹¹Lagà sa lawa't wayeg meeti amuk pengagdaw, owoy lagà ma sa dagat egtugdus anì endà kumedakel di, ¹²hediya ma mekedan sa etaw amuk mematay enù ka endà dé umenaw di. Taman sa egoh di duen pelà sa langit, endà dé umenaw di.

¹³“O Nemula, lidungi ko aken diyà bayà taman sa egoh di meelut dé sa kebulit ko kenak, dodoo tapay ko dé sa agdaw sa egoh ko meketuleng kenak. ¹⁴Amuk nematay dé sa etaw, enù di ya mehagtay pa dema? Dodoo angkat-angatan ku sa tigtu mepion agdaw sa egoh ku mekelaun kedu diyà sa kelikutan ku. ¹⁵Amuk umowen ko aken, sumagbì a doo enù ka meiyapan ko dé aken i etaw binaelan ko. ¹⁶Agulé tulikan ko sa langun egbaelan ku, dodoo endà dé egsagipaen ko duu sa medoo salà ku.

¹⁷Ipeuloy ko sa medoo salà ku, owoy tampulan ko ma sa medoo kenà ku nekeamu.

¹⁸“Dodoo lagà sa medoo tuduk mebugék, owoy lagà ma sa medoo dakel batu mehalì, ¹⁹owoy lagà ma sa medoo batu meliblib danà sa leges wayeg, owoy lagà ma sa tanà menanal danà sa meleges udan, hediya ma pedaetan ko sa egpeginawaen sa etaw. ²⁰Kedanan ko sa egkegaga sa etaw owoy hemagawan ko ma taman melugay, owoy mehalì ma sa palas di amuk mematay. ²¹Amuk hediya, endà dé metiigan di duu amuk mebaluy datù sa medoo anak di, owoy endà ma duen sa tumulon diyà kenagdi amuk pemalaen sa medoo anak di. ²²Iya daa sa tuggedamen di sa kesakit diyà sa hagdi munoy lawa owoy sa kekebukul di danà sa hagtay di.”

Ini Sa Egoh I Hob Migsagbì Diyà Sa Duma Di

19 ¹Na, mig-ikagi Hob i diyà sa duma di, guwaen di, ²“Maen di ya takaan yu eg-umanan sa kelikutan ku danà sa eg-ikagiye yu? ³Endà dé egsabuh yu takà egpeumàumà kenak, owoy endà ma memala yu kéen egpelonon kenak. ⁴Upama, amuk tuu nesalà a, endà duen sa niyu dahiya. ⁵Iya sa penemdem yu eglowon yu diyà kenak, owoy takaan yu egpenemdem sa kelikutan ku sa lagà egpetuu sa egoh ku nesalà. ⁶Mepion amuk metiigan yu si Nemula sa migpeukit ini i diyà kenak. Binaelan di sa lagà litag anì gapenen a.

⁷“Apiya di pa egpegeni a tabang, endà doo duen sa egsagbì diyà kenak. Egpegeni a sa metudà kepeukit, dodoo endà sinagipà da duu. ⁸Inalang i Nemula sa dalan ku owoy pinedeleman di ma sa ukitan ku, huenan di endà nekeukit a. ⁹Kinedanan di sa langun taman ku owoy sa kedatuan ku ma. ¹⁰Sinedibaluy di egtapes sa lawa ku. Lagà sa kayu binadut, kinedanan di sa egpaginawaen ku. ¹¹Tigtu egbulitan di aken, owoy pinelagà di aken sa kuntelà di. ¹²Pineukit di sa medoo kelikutan diyà kenak lagà sa medoo sundalu migpengayaw kenak. Migbael da sa kenà da kumabang owoy sineulingutan da sa dalesan ku.

¹³“Inikagiyan i Nemula sa medoo duma ku anì segumalayen da aken, owoy endà ma dé egsagipaen a sa medoo tigtu loyuk ku. ¹⁴Owoy endà ma dé eglengen da diyà kenak sa medoo tigtu duma ku owoy sa medoo loyuk ku. ¹⁵Apiya sa medoo etaw mesagkat eglengen diyà kenak egoh anay, nelipengan da dé aken. Owoy lagà daen sa keadat da sa etaw endà egkilalaen da duu sa keadat sa medoo egsugùsuguen ku diyà kenak. ¹⁶Amuk eg-umowen ku sa egsugùsuguen ku, endà egsagipaen di duu aken, apiya di pa tigtu a egpehiduhidu diyà kenagdi. ¹⁷Apiya sa sawa ku, egketétéen di dé aken, owoy endà ma dé egpedapag da diyà kenak sa medoo tigtu duma ku telahadi. ¹⁸Owoy apiya sa medoo batàbatà, egpelononon da aken owoy takà da eggemen amuk eghauwen da aken. ¹⁹Egkelepuhan a dé sa medoo tigtu loyuk ku, owoy egkuntelaen a ma dé

sa medoo tigtu eghiduwan ku. ²⁰Anan a daen tuelan, owoy buyu a ma dé egkematay.

²¹“O medoo loyuk ku, hiduwi yu aken enù ka binulitan i Nemula aken. ²²Maen di ya egpelihayen yu aken, lagà sa kepelihay i Nemula kenak? Enù di ya, endà pa nekeenget sa kepelihay yu kenak? ²³Mepion hedem amuk nekesulat sa inikagi ku anì mebaluy libelu. ²⁴Mepion ma hedem amuk nekesulat diyà sa batu^b anì endà mekedan di taman melugay.

²⁵“Dodoo netiigan ku doo melalù sa tegealuk ku owoy kagdi sa mekeatu amuk meuma sa sabuhanan agdaw. ²⁶Apiya di pa meledak sa lawa ku, tapay doo hauwen ku Nemula i. ²⁷Tigtu hauwen ku Nemula i. Tuu ma doo, hauwen siini mata ku kagdi i, owoy dakel sa ungayà ku humaa kenagdi.

²⁸“Maen di ya eg-umanan yu sa kepelihay yu kenak, enù ka guwaen yu dò danà ku doo sa kelikutan ku. ²⁹Dodoo edung ini egoh di, kelimedangi yu dé sa sundang umuwit sa kebulit i Nemula diyà sa medoo tegebael salà. Amuk hediya, metiigan yu doo duen sa Nemula atung tegeantang.”

20:1 - 37:24 Endà netuuwan sa telu loyuk i Hob diyà sa sagbi di. Agulé migsagbi dema Hob i diyà sa telu loyuk di. Agulé sa sebaen batàbatà maama si Ilihu sa egkelukuy egtulù diyà si Hob, dodoo kulang ma sa hagdi netiigan denu si Datù Nemula.

Ini Sa Sagbi I Nemula Diyà Si Hob

(Hob 38:1-31)

38 ¹Agulé mig-ikagi Nemula i diyà si Hob egpeunut diyà sa sepuk, guwaen di, ²“Maen di ya egkeduwa-duwa sa kesalig ko diyà sa naken keketiig? Nehaa sa egoh di endà duen sa netiigan ko. ³Tigdeg ka dé owoy pebagelbagel ka anì mesagbian ko sa medoo igsà ku diyà keniko.

⁴“Kenà ko ya egoh ku migbael siini tanà? Tulon ko diyà kenak, amuk medoo sa netiigan ko. ⁵Ngadan sa migsugù egoh sa tanà binaelan? Owoy ngadan ma sa migtembu? Netiigan ko pa langun ini i, atu? ⁶Ngadan sa kenà di pinetigdeg sa egtugek siini tanà? Owoy ngadan di etaw sa migtenà sa kenà di pinetigdeg sa bugsud di ⁷ligò di egkeanggan egduyuy sa medoo bituen, owoy egpetibos ma sa medoo egsugùsuguen ku diyà langit danà da egkeanggan?

⁸“Egoh sa dagat migsiyù kedu diyà sa kedaleman, ngadan di etaw sa migbelel sa lambeg di? ⁹Deleman owoy gaeb sa lagà igtedung ku sa dagat. ¹⁰Binaelan ku sa mantadan anì mealang sa dagat, owoy pinakelan ku sa medoo bengawan di. ¹¹Inikagiyan ku sa dagat, guwaen ku, ‘Taman ka daa dahini owoy petaman ko ma daa dahiya sa medoo dakel lambeg ko.’

^b 19:24 Iya sa ukit kesulat diyà batu panasangen.

¹² “O Hob, negaga ko pa egpeteleséng sa agdaw? ¹³ Enù di ya, negaga ko pa pelegdawan siini uwang tanà anì endà dé mekelidung sa medoo tegebael medaet? ¹⁴ Danà sa teleséng agdaw, nelegdawan sa langun eghauwen, lagà sa kehaa sa metolol ginis. ¹⁵ Danà legdaw sa agdaw, huenan di egkealang sa medoo tegebael medaet enù ka iya sa lagà egpekehawid kenagda egbael medaet.

¹⁶ “Enù di ya, nekeangay ka pa diyà sa keduwan sa medoo tebulan wayeg? Owoy nekeipanaw ka pa diyà sa pused dagat? ¹⁷ Netiigan ko pa sa kenà pintuan mangay diyà bayà? ¹⁸ Enù di ya, netiigan ko pa sa kelabel sa uwang tanà? Tulon ko diyà kenak amuk netiigan ko.

¹⁹ “Netiigan ko pa sa kenà di eg-edung sa legdaw owoy deleman? ²⁰ Megaga ko pa kagda ikagiyan sa tamanan da, ataw ka pepelikuen ko kagda diyà sa kenà da eg-edung? ²¹ Na, danà di lukes ka dé, petow ki daa netiigan ko, enù ka egoh sa tanà binaelan tapay ka dé kéen neetaw.

²² “Enù di ya, hinaa ko pa sa bilik kenà ku egtagù sa udan tigtu megenaw ataw ka sa bunga't udan? ²³ Tinapay ku iya wé atang amuk meuma sa agdaw kumedaet, sa sasang sa keseginaluway owoy sa sasang kesegilaway. ²⁴ Nekeuma ka pa diyà sa keduwan sa agdaw, ataw ka diyà sa keduwan sa kelamag kedu tebowon agdaw?

²⁵ “Ngadan di etaw sa migbael sa ukitan udan owoy sa ukitan silà? ²⁶ Ngadan di etaw sa egpeudan diyà sa melabel tanà mediyù dalesan? ²⁷ Ngadan di etaw sa egpeudan diyà sa netikal tanà anì tumunas sa medoo keluwen? ²⁸ Enù di ya, duen pa emà sa udan ataw ka aglù? ²⁹ Ngadan inay sa bunga't udan megenaw? Ngadan keduwan sa megenaw tanà ³⁰ egoh sa wayeg migketegas lagà sa ketegas batu diyà sa kagpa't wayeg?

³¹ “Megaga ko pa umalang sa keipanaw sa bituen telu, ataw ka sepalaken ko sa petel?”

39:1 - 41:33 Ini sa egoh i Nemula migsagbì uman diyà si Hob. Si Datù Nemula sa épê tigtu dakel egkegaga diyà sa langun egbaelan diyà siini sinukub langit.

Ini Sa Sagbì I Hob Diyà Si Nemula

42 ¹ Agulé migsagbì Hob i diyà si Datù Nemula, guwaen di, ² “O Nemula, netiigan ku dé sa egoh ko épê dakel egkegaga, owoy megaga ko mael sa langun ungayà ko. ³ Inigsaan ko aken maen di ya egkeduwa-duwa a egsalig diyà sa keketiig ko, ki endà ma duen sa naken netiigan. Mig-ikagi a denu sa medoo nebaelan endà netiigan ku duu owoy sa medoo mekegaip egkebaelan endà nepenemdem ku duu. ⁴ Inikagiyan ko aken anì duminegdineg a diyà keniko owoy anì mesagbian ku sa medoo igsà ko. ⁵ Egoh anay neketiig a daa sa denu keniko danà sa inikagi sa medoo liyu etaw, dodoo ini egoh di tigtu hinaa't mata ku dé kuna.

⁶Huenan di, egkemalaan a danà sa medoo inikagi ku, owoy egbuhbuhan ku abuh sa ulu ku tandà sa egoh ku nesenuê.”

Ini Sa Sabuhanan Kagi

⁷Na, egoh i Datù Nemula neubus dé eg-ikagi diyà si Hob, hê inikagiyan di ma Ilipas i sa tegeTiman, guwaen di, “Egbulitan ku kuna owoy sa duwa loyuk ko, enù ka endà eg-ikagi yu sa tigtu tuu kagi denu kenak, iling sa keikagi sa etaw ku si Hob. ⁸Huenan di, ini egoh di angay yu diyà si Hob owoy uwit yu sa pitu tudu sapi owoy sa pitu mandangan kebilibili, anì ulowen yu diyà sa atung kenà yu eg-ulow sa ibegay yu diyà kenak anì metigtuwan sa salà yu. Isimbà i Hob kiyu owoy dinegdinegen ku sa kesimbà di anì endà mekeuma diyà keniyu sa kepigtamay ku, enù ka endà eg-ikagi yu sa tuu kagi denu kenak iling sa keikagi sa etaw ku si Hob.”

⁹Hê, pinangunutan da i Ilipas si Bildad owoy si Sapal sa igsugù i Nemula diyà kenagda. Agulé hinoð i Nemula sa kesimbà i Hob.

¹⁰Na, egoh i Hob neubus egsimbà denu sa telu loyuk di, pinekawasà i Nemula dema. Segulê pa netakep sa kekawasaan di diyà sa kekawasaan di egoh anay. ¹¹Agulé sa langun duma di telahadi owoy sa langun tapay loyuk di, tinelow da Hob i owoy linenged da ma sa kepista di diyà sa dalesan di owoy tinulon da sa egoh da nebukul danà sa binaelan i Nemula diyà kenagdi. Uman sebaen diyà kenagda, migbegay da pilak owoy tising bulawan diyà si Hob.

¹²Na, egoh di neubus sa kelikutan i Hob, si Datù Nemula sa takà egtabang kenagdi diyà sa langun egbaelan di. Uman pa migkedoo sa langun taman di diyà sa egoh anay. Sepulù owoy epat ngibu sa kebilibili di owoy enem ngibu sa kamiliyu di owoy duwa ngibu sa sapi di owoy sengibu sa asnu di. ¹³Owoy mig-anak dema pitu maama owoy telu bayi. ¹⁴Ini ngadan sa telu anak di bayi, sa kakay si Himina, owoy sa keduwa di si Kesiya, owoy sa ketelu di si Kélén-Hapu. ¹⁵Endà duen sa bayi meketepeng diyà sa ketolol sa bayi anak i Hob diyà siini sinukub langit. Binegayan i Hob ma kagda sa baed sa langun taman di éhê mendaa sa kebegay di diyà sa medoo anak di maama.

¹⁶Edung egoh iya, nekeuma pa magatus epat pulù gepalay Hob i, owoy nehaa di ma sa medoo bébê lulud di. ¹⁷Agulé egoh di nematay, lukes dé temù.